



重濬孟瀆等三河全案卷五

江蘇布政使司梁章鉅爲詳請具

奏事竊照常州府屬武進縣境內開挑孟瀆德勝澡港
三河共估需土方夫工等銀二十萬六千七百餘兩
先於道光十年十一月內

奏奉

諭旨準其在於緩漕米價銀內動支借給興辦分年攤徵
歸款當卽給銀開工後正值雨雪連綿至十一年春
初仍因晴霽日少工力難施未能依期工竣所有尙
未開工之孟瀆河南段計長九千餘丈詳蒙

憲臺會同附片

奏明緩至十一年秋後農隙之時接續興挑在案其已
 經開工之孟河北段三千七百餘丈並德勝澡港二
 河節催趕辦直至上年四月中旬將北段之超瓢港
 等處工段先行挑竣其餘各工俱未能接續辦理詎
 上年夏秋雨水復多又兼江潮異漲各處田畝均間
 有淹浸河流無處宣洩嗣交冬令亦未一律消退以
 致嚴札頻催仍不能興工挑辦茲據武陽二縣詳稱
 履查各河存水雖有消退之處然深者尙有四五尺
 不等車戽固較前稍易但已當春令潮汐日旺及今
 趕緊辦理多所阻礙且三河原估已逾二年岸形壁
 立易於坍塌淤墊現須減深加寬覆覈改估庶可利
 垂久遠已據該董等呈請詳奉

憲臺批飭道府勘辦今欲開挑必先勘估由縣估詳
 道府覆勘逐層辦轉有需時日上年春工起於正月
 初旬已難辦理而現遲月餘並連上年未挑之孟河
 南段一併舉行工又加倍計開挑後不過月餘即屆
 夏令農忙為時尤迫即使一無兩阻亦萬難報竣矧
 天時更不可必再四思維實未敢冒昧從事察訪民
 情商之紳董均以請緩為宜請將孟瀆德勝澡港三

河未竣工程再行緩至本年秋後興工俾得從容挑辦以臻妥善而免草率仍乘此春水未旺以前先將各河口底寬深應增應減督董逐段勘丈探量確造估冊具詳聽候

題咨一俟冬令即可開工免致臨時再有稽遲貽誤等情前來本司伏查開挑孟瀆德勝澡港三河前歲興工後因雨雪連綿未能竣事業將未挑之孟瀆南段各工詳奉

奏準緩至十一年秋後興挑自不應再請展緩惟查此案挑工關係灌田濟運既因淤塞開濬必須覈實辦

理方資利賴上年秋後雨水過多各屬田畝均有被淹該河積水瀾滿交冬不退難以挑辦自屬實在情形現在舊水未消新水又長兼之春雨時行即使極力車戽必難盡善再四察覈與其遷就從事不若寬以限期俾得認真挑辦不致虛糜經費所有孟瀆等河未竣各工應請緩至本年秋後再行興挑以免草率而昭慎重仍飭令該府縣乘此停工期內將各河口底寬深丈尺應增應減處所覆加確勘估計先行造冊繪圖由道覆勘移司詳辦一俟秋後農隙卽行勒限趕挑一律完竣報請驗收斷不使再有緩延致

稽時日除移行遵照外相應具詳伏候

鑒覈具

奏爲此備由另冊呈乞

照詳施行

道光十二年三月初三日具詳

武進縣知縣姚瑩陽湖縣知縣廖鴻苞謹將武進陽湖二縣會挑孟瀆河已未挑工屢次詳緩及現辦情形開摺呈鑒

今開

查孟瀆河坐落郡城西北南連運河北達大江自邑西奔牛之萬緣橋進口爲孟河正幹至石橋而流分爲二一由石橋之南折東北而出江是爲小河一逾石橋之北迤西北而穿孟河城以出江是爲孟河老口該河引注江潮灌運濟漕而沿河附近之安西安東孝西孝東通江等五鄉三十五圖並富東通三洲

字號萬頃田疇均資灌溉自嘉慶二十年借

帑興挑後又已堙塞不通道光九年據該民人等赴司呈請興挑奉藩司梁委員元和主簿周誥會同卑前縣趙懷鏞卑陽湖縣鴻苞前往勘明實必應挑辦之工覈計河長八十餘里共估需土方夫工銀十三萬四千五百七十兩零舊口漲有老沙難以開挖改開超瓢港出口通江內應價買民田需銀二千九百六十三兩零又江口應需添建閘座以資啟閉宣洩估銀一萬八千八百六十二兩零於十年冬詳奉

奏準挑辦因奉文之時已屆歲底恐交春令春水易生

河身綿長同時並挑難以刻期集事經卑前縣程士偉及卑職鴻苞詳請將超瓢港改口及小河口並孟河城之護城河先爲興挑其餘各工俟十一年秋後再行挑辦計開工者三千七百餘丈發銀三萬四千四百餘兩詎開工後節因雨阻停挑至四月中旬僅據超瓢港改口工段挑竣報奉藩司梁詣工驗收餘皆挑未足數時已農忙詳奉停緩秋後補挑並據德澡二河原呈圖董以工甫過半而橋樁顯露岸灘屢卸皆由原估之時深益求深口窄底寬所致呈求減深加寬另行改估等情具稟而孟河原估挑深更甚

重刊三河全案 卷三 五
於兩河或尙有應行減估之處詳請乘此停辦之時
覆加勘估免致臨時周章因原案

奏明董辦官稽在先估冊又皆係該呈董等自行估造
遂仍飭逐段測探應否減深加寬改造估冊議呈覈
勘乃延至上年冬底並不呈覆而何以上年夏秋江
潮異漲至冬水未消退難以施工亦遂未請開挑卑
職瑩正月到任差查積水尙深固屬人力難施且原
估旣知未協現在工未復勘設草率從事亦不足利
垂久遠又經會同卑職鴻苞詳準緩至今冬挑辦一
面比差勒催呈董勘覆乃該呈董等一任差催總含

混具稟並不將應否減深加寬逐段切實聲明卑職
等細覈原估土方河面寬七丈者底寬三丈五尺以
對折收底而河身則挑深七八尺不等並有挑至一
丈以外者連舊有河形自底去岸總約計一丈三四
尺有餘兩岸壁立形同井式無怪上春開挑旋挑旋
坍工無底止必須減深加寬勢如坦坡方易挑辦竣
事該圖董等何以不肯改估再四體察輿論民情始
知該河原估土方例價之外資以津貼仍屬不敷董
事領銀雇夫挑辦不敷之價按畝幫貼錢文上春開
挑工段因節遭雨阻賠累甚多各董事聞風而懼孟

河迤北全仗此河引潮灌田之村庄其勢不能不挑
賠累在所不計第恐減去土方銀數亦減故改估之
說築室道謀迄無定議而孟河迤南毘近運河各村
莊初意開通孟河舟楫暢行亦資利便民情甚爲踴
躍近見開挑有賠累之苦而地近運河農田可以設
法灌溉亦不急需其利各有畏難苟安之見遂俱置
改估之事於不復但此河爲

奏明必不可緩之工業已兩次請緩今冬斷難任該呈
董等各逞私見再行延擱若拘泥從前董辦官稽之
說仍欲該董自行改估造冊恐終歸懸宕似須由卑

職等督同勘估庶可妥速卑職等先因催僂漕船繼
又趕辦

奏銷未克分身擬俟

奏銷事竣卽親赴各工段傳回原呈及鄉圖各董逐段
察看地形測探水勢如應減深加寬卽改造估冊呈
候委勘並現距原估之時已有二年之久其或有今
昔情形不同應另酌定章程者亦候卑職等勘明議
呈務期工歸實濟銀不虛糜以副

大憲利濟農漕至意再該河同德勝澡港二河土方
工價銀共計二十萬六千七百餘兩議請分作十成

援照康熙十九年鄰縣協濟成案歸於武陽錫金宜
荆六縣攤徵武陽二縣共攤五成錫金宜荆四縣分
攤五成各分限十年按照條銀徵還歸款謹畧
道光十二年五月二十四日呈

武進縣知縣姚瑩陽湖縣知縣廖鴻苞謹將武陽二
縣會挑德勝澡港二河已挑工次及現辦情形開摺
呈鑒

今開

一德勝河坐落郡城之西南由運河連江橋進口北至
魏村口出江該河自嘉慶十一年興挑後淤塞不通
道光九年估挑孟河詳請一併興挑計程四十五里
工長七千四百餘丈估需夫工銀三萬六千餘兩於
道光十一年春領銀興工當發銀一萬九千餘兩因
節遭雨阻延及四月半尙未報竣牽計工次僅止六

分尙有沿江河段一百七十一丈未及施工時已農忙稟請緩至秋後補挑而上冬水大不能開工卑職瑩正月到任又同卑職鴻苞稟請再緩至本年秋後挑辦其該河士民先因工程過半而橋樁卽已顯露岸灘屢挑屢卸工無底止皆由原估之時深益求深口窄底寬所致呈求改減之處詳準飭令改估造冊亦總未據該呈董等稟復經卑職瑩飭委小河司督催仍未復到再四體察輿情緣小民祇圖暫時之逸而不知計永久之利在先河身淤塞商農均屬不便故衆心踴躍亟求開挑些小賠累在所不計迨工挑

一半河流已暢舟楫可以通行田畝足資灌溉遂各存畏難苟安之見故一任差催置之不復但該河爲奏辦要工現未挑竣驗收憑何報銷斷難任該民人等偏執私見不辦現擬俟孟河勘明後卽傳齊各呈董面爲諭導督同逐段履勘改造估冊呈請委勘

一澡港河坐落郡城東北南由距郡城之十五里燕子河進口至圩塘港出江該河自乾隆三十年挑辦後淤塞不通道光九年估挑孟河詳請一併興挑計程三十五里工長五千四百餘丈估需夫工銀一萬三千餘兩於道光十一年春領銀興工當發銀八千六

百餘兩因節遭雨阻延及四月半尙未報竣牽計工
次僅止八分尙有沿江河長七十丈未經施工時已
農忙稟請緩至秋後挑辦上冬水大不能開工卑職
瑩正月到任又同卑職鴻苞稟請再緩至本年秋後
挑辦其該河土民先因工程過半而橋樁卽已顯露
岸灘屢挑屢卸工無底止皆由原估之時深益求深
口窄底寬所致呈求改減之處詳準飭令改估造冊
節催未到卑職瑩飭委典史督催今據送到冊內除
原估挑深三尺以下及工已九分者仍照原估挑辦
毋庸減深外其挑深在三尺以上者呈請酌減一尺

河面增寬五七尺不等現擬俟孟德二河勘明卽親
詣該處督同各呈董逐段按冊勘丈改造估冊呈候
委勘

道光十二年五月二十四日呈

武進縣知縣姚瑩陽湖縣知縣金咸謹稟竊奉

鈞札內開詣勘已挑未竣之德勝河段探量水勢較與運河河底高仰數尺餘寸通河深淺未齊從前停工之時如何存記定準原估尺寸誌椿以備符合補挑分數且王下村以下兩岸間段坍卸應設法堅築以免復坍至馬家橋金門低矮潮旺之時舟楫難行亦應籌議而澡港水勢較覈德勝河尤爲窄淺其孟瀆河已開工段孟河城之護城河測探南北水平該處業已淤高二尺查係原估本淺必須補挑通暢等因查德勝河坐落運河東北北去地勢較高至連江

橋進口之處卑職現委卑縣縣丞方友椿前去探量
運河水深七尺二三寸連江橋口內河段亦深六尺
七八寸不等並無高仰數尺餘寸之多現在原估挑
深丈尺已嫌過深呈請改減若欲挑至同運河河底
一律坦平勢萬不能至各段已挑工次上春停工時
經前縣勘定造冊具詳有案此時已有淤墊應責令
同兩岸坍塌之處補挑如式馬家橋金門低矮有礙
舟行並查有許家橋金門亦矮現飭該董等拆卸改
造澡港河已據該董等造呈估冊減深加寬卽飭取
結挑辦惟限於地勢不能再行寬放孟河護城河從

前短估二尺之工飭據該董等稟稱原估之時舟船
皆定由城內行走該處並非正河因兩岸逼近民田
又間有義塚口面窄狹不能放寬遂估淺三尺奉

憲詣勘之時已將細情面稟等情當卽傳述

鈞諭以孟河城內水關低矮不能行走大船令該董
等將該處改爲正河讓出義塚增估挑深應買民田
勘定價買已據該董等具結認辦除將詣勘德勝澡
港二河情形隨同本府具稟

各憲外緣奉札飭理合稟候

鑒覈再孟河已奉勘明覈稟合并聲明

道光十二年九月十六日具稟

常州府知府羅士菁謹稟竊照武進縣覆勘孟瀆河酌議改估事宜稟呈圖摺奉

藩憲批府勘估詳辦等因並蒙發摺圖到府卑府遵卽帶同陽湖縣主簿章恩榮於八月二十八日親詣孟河督率紳圖各董逐段履勘以通河形勢而論老岸有高低不一估挑有深淺不同岸低挑淺者河底不妨稍寬而岸高挑深者若口窄底寬則兩旁肩土易於坍卸原估口底丈尺不問開挑之深淺概以對折收底以致河岸形同壁立不能成斜坦之勢殊未妥善而岸旁皆屬民田河面又難再行寬放祇有收

底之一法武進姚令前議請以挑深在六尺以下者口寬七丈底寬三丈六尺以上至九尺者口寬七丈五尺底寬二丈八尺九尺以上至一丈以外者口寬八丈底寬二丈六尺分別挑深等次以定收底分數挑愈深而底愈收所議尙爲允協其餘酌議各條詢諸輿情亦順應卽請俯如所議辦理惟原摺內開夏墅橋金門窆深八尺以下卽現橋樁恐挑深於橋身有礙並慮於老底相近土堅難以開挑通河情形相仿日後能否如式挑竣示諭各董及早呈明請減一層卑府意以孟河淤墊已久此次興工不易必須講

求永久之計自以深濬爲主卽督董逐段籤樁試探尙不致挑至老底問有一二段遇老底堅土樁木不能深入覈計估挑丈尺亦祇淺去三四寸不等似未便因一二段情形微礙遽將通河議減已飭該董等照原估開挑又孟河城外護城河上春開挑工竣驗收不足飭諭補挑現在卑府詣勘以水平測量原估丈尺雖已補挑足數然此較通河底高尺餘詢據呈董等稟稱原估之時舟船皆定由城內行走該處並非正河因兩岸逼近民田又間有義塚口面窄狹不能放寬遂估淺二尺等語但查此河開通不獨灌田

濟運兼以通商每逢冬春之間糧艘空重經行運河
阻塞商船不能進入京口卽可繞道此河直達蘇杭
則外來之米豆油煤等貨各處俱可終歲流通無虞
缺乏裨益閭閻誠非淺鮮今勘孟河城南北水關低
矮江廣巨船斷難進出若由城外行走而高處高仰
尺餘遇有重載必致淺阻一交冬令水涸更難通行
大於商民不便當卽飭該董等將該處改爲正河讓
出義塚增估挑深應買民田勘定價買卽據該董等
具結認辦並據通河呈董呈請於農事畢後趕十月
初一日開工亦諭飭赴縣具呈通詳除催造改估土
合稟候

方細冊趕於本月內由縣詳送並飭縣將扣存支用
平市若干造冊具呈外所有卑府詣勘孟河緣由理
合稟候

鑒覈再德勝澡港二河應行改估之處已督同武陽
二縣勘明現在另行稟辦合併聲明

道光十二年閏九月初 日具稟

武進縣知縣姚瑩陽湖縣知縣廖鴻苞爲會詳事竊
照卑武進縣孟瀆一河坐落縣城西北向分南北兩
段南通運河北達大江旱則引江潮以濟運灌田並
可直達無錫金匱宜興荆溪各縣以資接濟如遇水
潦卽宣導入江不致壅溢爲患實爲卑武進縣水利
要道因年久淤塞先於道光四年據該河士民徐汝
田等呈請借

帑興挑南北並濬並須改開新口修築閘座經卑武進
縣汪前令勘估需銀九萬九千餘兩造冊通詳奉
憲批准旋因三河水利同時併辦經費支絀札飭緩

挑繼值奉文停辦工程期內未及舉辦迨至九年十二月接奉

藩憲札知停期已滿飭查該河現在是否淤塞應否挑濬札委元和縣主簿周誥來縣會同卑武進縣趙前令及卑陽湖縣鴻苞勘得該河淤塞已久且自原估之後續有淤沙漲增地段應行一併估挑並議請改開超瓢港口以達江潮又據德勝澡港二河士民呈請並濬遂一併勘估具詳統計孟瀆德勝澡港三河夫工銀兩及添建閘座置買民田改開新口共估需土方夫工料物銀二十萬六千七百二十四兩零

隨據孟瀆河漕田鄉圖士民以是河歷屆開挑原定安西等五鄉三十五圖漕田圖分及富通東三洲字號沙洲業戶按田均派承挑近年沙洲積漲較多河段愈遠請以漕段歸漕沙段歸沙並以嘉慶二十年借

帑開挑僅止一萬八千有奇而徵還已越十年之外尙多積欠今次估挑

帑至十餘萬之多若仍歸原領承挑各圖攤還歸款民力實有未逮稟經議準分別漕沙段落各歸各段挑辦漕田段落則歸於安西安東孝西孝東通江等五

重刊五清等三河全案 卷五
鄉三十五圖承挑沙洲段落則歸於富通東孟等沙洲字號挑辦並請將所借

帑銀歸於得沾水利之錫金宜荆及卑二縣以十股分攤內卑二縣共攤五成錫金宜荆共攤五成各分作十年攤徵歸款於道光十年冬詳奉

奏準與挑卽據孟瀆河南北兩段沙洲段落及漕田段內之護城河段董呈請先行挑辦其餘工段因陰雨稽遲時已歲暮恐春工趕辦不及請緩至十一年秋後開挑經卑武進縣程前令會同卑陽湖縣造冊通詳嗣據興挑段落以原估河底丈尺係按河面寬廣

之數五折減收形勢壁立易於坍塌並以濱江河段遞年加淤呈請加寬河面減收河底加估挑深又經覆勘明確據稟具詳旋據北段沙洲超瓢港及護城河呈報完工卽經報蒙

藩憲臨工驗收奉以超瓢港河段工次已足准予收工護城河則間有未盡如式諭飭補挑而南段沙洲小河口等處工段均因雨阻遲至農忙未能挑竣亦經詳明緩俟秋後興挑其護城河驗飭補挑之段續據承挑董事趕乘壩座未開丁夫齊集補挑如式報經卑武進程前令驗明屬實因值各河停緩不及詳

請驗收當將驗明補挑如式緣由具詳聲明俟秋後各河挑竣一併驗收各在案嗣緣同時挑辦之德澡二河各以挑工過半卽岸灘屢卸橋樁顯露實由原估過深口窄底寬所致呈求減深加寬而查覈孟瀆河已挑段落亦因五折收底形勢壁立詳予改減其未挑之漕田段落原估概照五成收底挑深尤甚恐有未協遂詳明一併覆勘改估再行挑辦適因去夏江湖異漲河水充溢至冬未消不能勘估興工本年正月內卑武進縣姚瑩到任差查積水尙深而時已交春恐江湖日長有阻挑工且稔悉上春德澡二河

舉辦春工諸多掣肘詳明緩俟今冬挑辦卽趕乘停工期內會同周歷通河逐加勘丈查原估通河工段本有深淺之不同而河底則統視河面寬廣之數折半減收並不計所挑之深淺示以區別在估挑較淺岸坡平坦之處已微覺窒礙再遇挑深較甚及河岸高峻之區則形如井式勢易傾坍卑職等悉心籌議擬視原估開挑之深淺酌定口底寬狹分別等第明立章程如挑深在六尺以下者定以口寬七丈底收三丈六尺以上至九尺者口寬七丈五尺底收二丈八尺九尺以上至一丈以外者口寬八丈底收二丈

直隸三河縣志卷五
六尺挑愈深則面愈寬而底愈窄庶兩岸勢成坦坡不致坍塌其遇老岸高峻及逢城逢鎮之區限於地勢不能如前數挑辦者再行酌減計挑深則自四尺起挑至一丈二尺五寸爲止河面白五丈至八丈爲率河底以二丈起挑至三丈爲度並將附近畸零村落河段量加遠土工價詳開條款會同錄摺稟呈嗣奉本府復勘以正河由孟河城內行走不便行舟將城外護城河改作正河原估丈尺本淺雖已如式挑竣而比較通河水平獨形高仰飭令增估補挑具稟憲案卑職等遵卽勘明該處加估挑深必須放寬河

面兩岸悉係民田應行價買而工頭奔牛萬緣橋口外河長五丈半落運河之中在先尙屬寬深自勘估後又歷數年已多淤墊該處爲南段咽喉進潮要地更不可不行增挑河段旣增原估壩座不足以資攔禦亦須增估所有前項增估夫工壩座及置買民田自應一併另給工價一體報銷其前議恐挑至老底酌量減深一層已奉本府飭令毋庸議減業據該董等具結呈案情願照估開挑統計漕田段落原估河長九千八百五十五丈三尺連增挑工頭口外河長五丈並先經挑竣現請增估寬深之護城河工長三

百零四丈五尺及已挑未竣之沙洲段落七百五十丈並已竣報收之超瓢港河長二千七百丈統計應挑河長一萬三千六百一十四丈八尺實需夫工銀十二萬六千八百零四兩一錢零四釐又壩座銀一千一百五十二兩七錢零九釐田房墳塚銀三千二百五十六兩二錢五分三共銀十三萬一千二百三十三兩零六分三釐覈與原估土方夫工壩座田房銀十三萬七千五百三十九兩四錢二分六釐之數計節省銀六千三百二十六兩三錢六分三釐取具各鄉圖董事切結現在分別造冊呈送是否允協除將

德澡二河另行勘辦具詳外相應繪圖同冊具文詳送仰祈

憲臺鑒覈實爲公便

道光十二年閏九月二十九日具詳

武進縣知縣姚瑩陽湖縣知縣廖鴻苞爲會詳事竊
卑武進縣德勝河坐落郡城之西孟河之東由運河
連江橋入口至魏村江口止計河長四十五里澡港
河坐落郡城東北由運河分流入鎖橋燕子河一十
五里進口至圩塘江口止計河長三十五里該二河
俱南通運河北達大江非但兩岸田疇數十萬畝藉
資灌溉並能引注江潮輔翊孟河濟運德勝河係嘉
慶十年興挑澡港河係乾隆三十一年興挑均因年
久失修類多淤墊前於道光九年冬接奉

藩憲札查孟瀆河應否挑濬委員下縣勘辦卽據該

二河士民呈請興挑當經卑武進縣趙署令卑陽湖縣廖前令一併勘估具詳計德勝河估需夫工壩座銀三萬六千九百三十九兩四錢三分九釐澡港河估需夫工壩座銀一萬三千三百八十三兩九錢二分八釐連孟瀆河夫工壩間置買田墳改開新口等項統共實需銀二十萬六千七百二十四兩零因各河通潮濟運直達無錫金匱宜興荆溪各邑均資接濟請歸卑二縣及錫金宜荆六縣以十股分攤內卑武陽二縣分攤五成錫金宜荆共攤五成各分十年攤徵歸款於道光十年冬詳奉

奏準興挑隨據該二河先後呈請挑辦十一年春令開工卽值春雨連綿遲至農忙未能挑竣且有沿江工段因江潮漲旺未及興工經卑武進縣程前令會同卑陽湖縣廖前令詳請緩至是年秋後補挑嗣據各該河呈董以工甫過半而橋樁顯露岸灘屢卸皆由原估過深且口窄底寬所致呈請減深加寬詳奉批飭改估旋值去歲夏秋江潮異漲未及勘改興工武進縣程前令卽因案卸事卑職姚瑩本年正月到任差查積水尙深而時已交春上年春工前車可鑒詳明緩俟今冬挑辦嗣卽會同卑陽湖縣廖前令勘明

孟瀆河應改情由造冊通詳並於十月詳報開工在案茲卑職等復會同前詣德澡二河勘得德勝河原估水平未經探準南北河底高下懸殊並估挑過深岸灘易卸而澡港河則兩岸高峻限於地勢不能放寬挑深之後坍塌卸更易當督飭該呈董逐段勘定放口若干收底若干減深若干飭取各呈董認挑切結開摺具稟

憲鑒茲復催具造送各估冊前來統計德勝河估需夫工壩座銀三萬九百一十七兩三分一釐較之原估銀三萬六千九百三十九兩四錢三分九釐計節

省銀六千二十二兩四錢八釐澡港河共估需夫工壩座銀一萬三千二百三十二兩四錢四分五釐較之原估銀一萬三千三百八十三兩九錢二分八釐計節省銀一百五十一兩四錢八分三釐現已飭趕緊築壩戽水興挑其兩河沿江公河德勝河計長三百丈內已挑者一百二十九丈未挑者一百七十一丈澡港河公河一百四十丈內已挑者七十丈未挑者七十丈時交冬令江湖尙未消退尙難興挑擬請俟冬深潮縮之後多集人夫搶挑完竣以便一律詳報驗收是否允協相應造冊繪圖具文通送仰祈

憲臺鑒覈

道光十二年十月二十七日具詳

武進縣知縣姚瑩陽湖縣知縣金咸謹稟竊照卑武進縣境內興挑孟瀆德勝溧港三河業經卑職瑩會同卑前陽湖縣廖鴻苞先將履勘孟瀆河改估情形稟陳

憲鑒並詳報開工在案茲卑職等復會同前詣德勝溧港二河逐加履勘查該二河上春業已開挑因工次過半而岸灘屢卸橋樁顯露呈董人等僉稱原估過深呈請減深加寬詳奉批飭改估卑職等勘明德勝河坐落郡城之西孟河之東由運河連江橋進口爲該河工首至魏村江口工尾止歷係懷北安東孝

西孝東依東依西六鄉三十二圖承挑地勢本屬北高南下河形亦北淺南深測探水平自工首連江橋起至王下村迤北止係懷北安東等十圖承挑上春已挑工次僅五六分當此冬令潮涸之際尙水深五尺以外較之北段工尾挑至八九分工次者河深已相彷彿詰據呈董人等僉稱原估之時因潮汐長落靡長水平未經探準約畧估計遂致南北高下懸殊深淺不一現今此段河身已極通暢足資灌田濟運難再開深求照已挑工次就水鏟撈平坦懇免屏水補挑卑職等當以挑辦河工必須測探水之深淺將

河底一律挑平今南段進口之工五六分工次者已與北段江口挑至八九分工次水深相等而北段因岸灘屢卸尙須減深覈計南段有五分工次河底卽與北段改估之工相平其業已挑至六分者無從縮減似未便再行屏水深濬徒耗民力應請免其補挑責令將河面開寬其間有岸坍及水底不平之處就水鏟撈平坦報請驗收其自王下村迤北各段由安東六都二圖起至依西鄉三十九都五圖止因土性浮鬆岸多坍卸原挑工次已多淤墊又依西三十九都六圖起至四十都五圖止雖有八九分工次口底

未經如式均願補竣完工隨取具改估各結存案並督飭該董等就河之形勢逐段勘定放口若干減深若干收底若干分別開具清摺呈送免致再有口窄底寬岸灘屢卸之虞又勘得澡港河在郡城東北由運河分流入鎖橋口燕子河一十五里爲澡港河工頭至圩塘江口工尾止係德澤循理依東三鄉二十六圖承挑南北河身探以水平雖稍有深淺尙不如德勝河懸殊之甚惟兩岸高峻不能過於放寬原估太深亦不能如數挑足現據該河士民請照原估將挑深三尺以上者減深一尺放寬河面五尺七尺不

等其工頭德澤循理三圖原估挑深一二三尺及工尾依東三圖原估挑深六七尺者均照估挑辦請免減深放寬卑職等查覈該呈董等不以水平定估挑之深淺惟以挑深三尺上下爲減深與否之準則河底已不能一律平坦然尙不過微有參差若工頭工尾再照原估開挑不與通工併減則河形兩頭低窪中段高仰恐多格礙當向呈董人等詰詢僉以此河北段淤淺南段工首各圖河底舊形本深因向定章程此河開挑必三鄉二十六圖通力合作不能不一併估辦是以祇均估挑深一二三尺不等原估業已

直隸通志卷五
扣縮勢難再行酌減致通河輿情不協况工頭迤南
俱屬不挑河段底總高於現挑之河一經雨淋潮灌
泥土必先積於低窪之區而工尾三圖河段則濱臨
大江朝朝夕汐沙重更易停積是兩頭雖較中段稍
深然易於受淤數年之後即可齊平再三懇求照辦
卑職等復同紳董逐一覆勘所稱係屬實在情形自
應俯順輿情辦理亦卽飭令各具切結呈案除再催
令趕造估冊繪具圖形另行詳送外所有德藻二河
會勘緣由理合開具改估清摺稟候

鑒覈

道光十二年十月二十九日具稟

武進縣知縣姚瑩陽湖縣知縣金咸謹稟竊照卑二縣開挑孟瀆河自開工後屢逢雨雪業經先後報明茲自十月二十六日晴霽卑職等督飭各鄉圖董事加添夫工趕緊興挑二十七八九等日陰晴不定至二十九夜續又遇雨三十日仍連雨不止暫行停工至十一月初一日天色晴霽卽下塘興挑因僅止停挑一日未經通報卑職瑩於初二三等日會同紳董余保純并各段委員親至各河段查量工程內挑一分以上者七圖二分以上十三圖三分以上十圖四分以上五圖牽計通河工程約有三分當將工程最

少各圖之夫頭量子責做其踴躍急公者面加獎勵
通河頗爲感愧并有情願趕辦夜工者方冀日有起
色詎初二夜復降微雨初三日辰刻忽轉東北狂風
現在大雪瀾漫彤雲密布勢甚沈重卑職與紳董冒
雪巡查通河雖有龍溝積水已至四五寸各董事等
尚在風雪之中趕緊車戽而河挑漸深泥滑愈甚不
但挑土者難以上岸卽挖土各夫深淖之中亦難立
足兼以風雪嚴寒手足僵凍蹲伏窩蓬之中情形殊
堪憫惻委難催令下塘除諭飭各董事夫頭等於工
價之外每夫日給米一升以爲雨雪停工飯食無使

枵腹難充致令走散一俟雪霽卽趕緊興挑另文呈
報外合將先後續遇雨雪停工及查勘工程分數緣
由先行開摺稟報仰祈

憲鑒

道光十二年十二月初三日具稟

武進縣知縣姚瑩陽湖縣知縣金咸謹稟竊卑武進縣開挑孟瀆河前因截至十一月二十五日工次已至七分並是夜復遇雨雪緣由具稟

憲鑒在案嗣於二十七日雪注河中滲水已深三四寸有餘當卽督飭各董多備水車加夫趕戽一面集夫搶挑截至本月初三日止呈報工竣者已有八圖其餘雖不能依限報竣大率八九分工次者居多然河逾挑深而河之害累愈甚挑辦艱難不堪言喻一爲坍岸口底寬深挑足之後兩岸肩土卽中腰開裂往下坍矧泥土盡行擠入河心並有自上崖崩裂全

岸傾卸入河者逐段皆有長自十餘丈至七八十丈不等一爲泛沙泥土黑色宛如糜粥自河底洞中湧出甫經挑淨旋即淤漲如故工無底止情形與鎮江之豬婆灘相似前議存俟工竣搶挑無如愈湧愈多積日加增旁流四溢斷非臨時搶挑所能竣事一爲泛泉在河之土必須水涸方能挑挖河內泉眼甚多日間車涸一夜又復滲積每日疲於車戽竟無休息之時此等泛沙泛泉通河皆有而通江鄉承挑各圖爲尤甚一爲老底土色有綠黑不同而性則一律堅硬鍬鏟皆屬無用須以大山鋤二齒鉞力掘功與鑿

石無異挑已多日而原報老底各段仍存七八寸或尺餘不等據該董事等紛紛呈訴以原領土方本屬不敷卽須按方增貼乃自開挑以來屢遭雨雪虛糜夫工倍增賠累各自勉力挑辦工次已有八九分而艱累情形更甚於前實力難支持求請查覈等情卑職等均因閩省兵差須親身在城照料而河工亦關緊要不敢稍爲膜視卽赴工督同委員紳董等逐一查勘該董等所訴俱屬實在情形卑職等熟籌調劑之法內老底一層河旣挑至老底其通暢可知該董等因雨雪賠累已深卽未照估如式而於河身無礙

似可從寬酌減但該董等願甘賠累具結詳報在先卑職等未敢擅準允爲稟請委員勘辦其坍岸泛沙泛泉等項則有礙深通必須設法挑濬庶可無誤當令該董事等多備椿木遇有坍岸各段於岸腳排釘擋護後再行挑挖免致復坍泛沙詢諸鄉耆土人俱云搶挑完竣卽行放水蓋往可以不致再泛但必須照估加深一尺以住工放水之時沙卽已漲俟漲至尺餘而水總可放足卽可蓋住不致再有增長又必須挑挖放水一日趕成若中有間斷又工歸無用泛泉亦惟有多備泥夫戽涸之後儘一日搶挑竣事當

卽勸諭各董通力合作照此設法趕緊辦理工費不足再向圖民婉勸公捐已據該董等各具遵結照辦詎初七日午後大雪初八日雨雪交加至夜始住又值天暖開陽久結之冰亦復融化入河在河積水深處竟有一二尺至淺者亦有七八寸牽計一圖戽水之費非二三百千不可承挑者三十五圖通河約增費一萬餘千該董等在先已疲累不堪今忽又增此重累力何能支而已竣之工土性浮鬆並有因雨雪坍卸者卑職等目擊情形實深焦灼現已天霽卑職等惟有同該董等商酌車水章程設法車涸再督飭

直隸通志卷五
各夫將坍岸泛沙等處照前議設法挑辦務於十日
內工竣稟請驗收斷不敢稍存畏難苟安之見除屆
期另稟外所有現在工次艱難並復逢雨雪及老底
請減各緣由理合稟候

憲臺委員勘辦實爲公便再較量挑河寬深尺寸原
釘有水旱封墩但水封墩釘立河心以備泥夫藉知
挑土深淺之則若收工時較驗挑深丈尺須連未挑
之老岸一併較量在內丈尺方準則以旱封墩爲主
水封墩爲無用之物而泥夫存畱墩土約有數方之
多工竣搶挑殊費周折已飭該夫等將墩心椿木加

釘堅固泥土概行挑除合並聲明
道光十二年十二月初十日具稟

常州府知府汪河督同武進縣知縣姚瑩陽湖縣知縣金咸謹稟竊卑府督同卑武陽二縣開挑孟瀆德勝澡港三河內孟瀆河漕田段落上年挑辦工竣已報奉

憲臺驗收惟德勝澡港二河及孟瀆之小河江口並補濬之孟城護城河未經竣事本年正月經卑職瑩等催令德澡二河董事夫頭雇夫先後下塘開挑均經報明在案並親駐工所嚴飭搶辦卑職瑩等旋因示期正月二十二日縣試回城辦理考試事宜卑府河遂於二十二日赴該二河督辦開工以來雖未疊

遭陰雨而上冬雨雪過多土膏太潤沿河之溝塘存水悉往下浸河中滲水易積每日車戽之工倍於挑挖以致工難速竣現經卑府會同德澡二河督辦署卑府督糧通判鍾其恕督同局員章恩榮及各段員並添委之各總催等分頭催辦截至正月二十九日止德勝河江口之公河三百丈澡港河江口之公河一百四十丈業據報經卑府驗明工竣其二河壩裏現挑河段及德勝河南段詳明鏟撈之工卑府逐段勘丈口底寬深俱已足數惟兩岸間多臃肚坍卸未能修整如式已飭該委員等勒限嚴催儻挑計期二

月初五日可以一律完工伏祈

速賜親臨驗收俾得早日開壩放水撐岸免致續坍實爲公便其孟瀆河之小河江口及孟城護城河均已開工尙未能同時竣事容俟挑竣另行稟報至德勝澡港二河封墩上年釘立時因舊椿處所無從辨識曾經卑職瑩等詳明卽以該紳董在先暗記之橋面河底相距若干丈尺爲準測探水平定各段補挑之深淺而前次孟河收工又稟奉

批諭水封墩不可爲準旱封墩亦不足信飭將各橋座石岸木梁可爲定準之處寫明挑工尺寸以便查

對此次驗收除封墩仍請照例較量外並將各橋座
先經記明挑深尺寸一并開具清摺呈候

鑒覈再孟瀆河前奉驗收各工遇雨坍卸之處及岸
旁近泥已札調各段員赴工督率各董事夫頭雇備
船隻泥夫認真撈鬮翻運並超瓢港已竣復淤河段
亦經卑職瑩倡率捐挑均先後稟報在案卑府等現
仍督飭該董等妥協辦理務期一律平坦深通尅期
告竣斷不敢以工已驗收或因捐辦稍爲忽視致干
咎戾合並聲明

再稟者德勝河老岸甚高原估皆從岸之中腰挑起
故河面難於放寬其形甚窄上年改估雖經減深卽
間有稍爲放寬之處礙於地形兩岸仍不能斜坦岸
陡土鬆不免間有坍卸現在坍卸入河之土已起除
淨盡河之口底寬深逐段丈明有盈無絀惟兩岸中
腰因挑坍卸之處凸凹不一若欲挑成坦坡之勢則
須上自岸頂層級挑下方能斜坦口底盈餘已屬估
外之工若再責令放寬挑挖賠累甚鉅民力斷有所
不能儻用土填平則新舊兩不相膠見水卽瀉仍爲
河身之害似祇可將凸處鏟削於凹處聽其自然不
過收工之時看去未能十分整齊於工次實無妨礙

澡港河情形亦大略相同理合附稟
道光十三年二月初三日具稟

武進縣知縣姚瑩陽湖縣知縣金咸爲會詳事竊查
卑武進縣境運河之北有孟瀆德勝澡港三河皆南
通運河北達大江旱則引江潮濟運灌田並可直達
無錫金匱宜興荆溪各縣以資接濟如遇水澇卽宣
導入江不致壅溢爲患實爲卑武陽二縣及各屬水
利要道惟孟瀆河自嘉慶二十年興挑德勝河自嘉
慶十一年興挑後均已湮塞不通澡港河自乾隆三
十年興挑至今已越六十餘年亦久經淤墊道光九
年經卑武進縣趙前令卑陽湖縣廖前令詳請借
帑挑辦蒙

憲臺勘明數十里並無江湖灌注地勢既高水泉枯渴農田積年受困民望孔殷委係刻不可緩之工飭據卑前縣督令董事人等估計三河土方夫工及建閘等項共需銀二十萬六千七百餘兩先請於藩庫借領分作十成照康熙十九年鄰縣協濟成案歸於武陽錫金宜荆濱河六縣攤徵內武進陽湖二縣共攤五成無錫金匱宜興荆溪四縣分攤五成各分限十年歸於地丁項下併徵分解歸款其在工委員薪水書役飯食以及挑夫搭棚並一切雜費循照歷屆挑河成案在於工價內每兩扣平五分爲經費

之用均經卑前縣等先後具詳於十年冬底蒙

奏準興辦卽據孟瀆河呈董人等以時已歲暮欲通河開挑工程浩大恐春令多雨難以趕辦請將小河口及新改超瓢港江口並孟城護城河工段先行興工餘悉緩至十一年秋後辦理其德澡二河因工程較易咸請挑辦詎開工後卽值春雨連綿至四月中旬僅據孟河之超瓢港江口工段報竣詳奉

前藩憲驗收其餘各工均未及半已值農忙之際詳奉停工秋後補濬旋因十一年夏秋江湖異漲冬未消涸三河有原估未協應須改估之處河水充盈不

能勘辦又經卑職瑩會同卑前陽湖縣廖令詳請十二年冬季再挑嗣於十二年秋後水落勘明三河寬深丈尺應增應減督飭該呈董等改定土方銀數造冊具呈並嚴催趕辦孟瀆河擇於上年十月初十日開工澡港河於十一月二十一日開工德勝河於十二月十五日開工均經先後呈報因復疊遭雨雪工力難施至本年二月內始次第竣事又經先後報蒙憲臺照估驗收現俱啟壩放水三河一律深通統計孟瀆一河工長一萬三千六百十六丈三尺實用土方夫工例價津貼壩座工料共銀十二萬三千二百

六十兩五錢七分八釐德勝河工長七千四百四十四丈五尺五寸實用銀三萬一千六十一兩四錢六釐澡港河工長五千四百四十八丈四尺實用銀一萬三千二百三十二兩四錢四分五釐又因孟河舊口漲有老沙難於開挖改開超瓢港出口通江並加寬孟城護城河改作正河應價買挖廢民田及遷移墳塚共銀三千二百五十一兩五錢八分八釐小河江口添建閘座估需工料銀一萬八千八百六十二兩八錢五分九釐共銀十八萬九千六百六十七兩八錢七分六釐較原估二十萬六千七百二十四兩

六錢五分二釐之數計節省銀一萬七千五十六兩七錢七分六釐開工於上年十二月初六日開工節因雨阻尙未工竣除催監辦委員望亭司巡檢張訓遙督率工匠迅速趕辦另文報請驗收外所有三河工竣改估實用銀數理合造冊加結具呈

鑒覈

道光十三年三月二十八日具詳

江蘇布政使司陳鑾爲詳請具

奏事竊照常州府屬武進縣境內開挑孟瀆德勝澡港三河原估土方夫工及築壩工料添建閘座等項銀二十萬六千七百餘兩先於道光十年十一月內

奏奉

諭旨準其在於緩漕米價銀內動支借給興辦分年攤徵歸款當卽給銀開工後值雨雪連綿至道光十一年春初仍因晴霽日少工力難施未能依期工竣詳蒙憲臺會同

前撫憲附片

奏明緩至道光十一年秋後農隙之時接續興挑詎因是年夏秋雨水復多又兼江湖異漲各處田畝均間有淹浸河流無處宣洩嗣交冬令仍未一律消退以致不能興工挑辦且須復勘改估又經梁前司詳請緩至道光十二年秋後再行興挑

奏奉

硃批知道了欽此欽遵移行道府縣親詣各河將口底寬深丈尺應增應減之處確切覆勘造冊繪圖送司覈辦催據武陽二縣勘估實需銀數據報於道光十二年閏九月初十日籤椿築壩陸續開工至道光十三

年四月十八日通工完竣先蒙

撫憲將孟瀆德勝澡港三河照估驗收嗣據武陽二縣稟報開工完竣

憲臺批司前往查驗等因本司遵於四月二十六日束裝起程赴常於二十八日行抵該處驗得孟瀆河小河口石閘一座雙槽金門口寬二丈三尺由身直長三丈二尺上雁翅斜長三丈六尺上迎水連裏頭長七丈六尺下雁翅斜長三丈六尺下束水連裏頭長七丈六尺高深一丈八尺六寸實用工料銀一萬八千八百六十一兩八錢五分九釐覈與原估相符

尚無偷減草率情事其挑竣孟瀆德勝澡港三河先蒙

憲臺臨工驗收查覈該三河工段內孟瀆河南段自奔牛鎮萬緣橋運河口起至小河口及北段石橋灣河口起至塔山壩隄并孟永洲至丹邑六沙大圩超瓢港江口止共河長一萬三千六百十六丈三尺估挑口寬六丈至十二丈底寬二丈至四丈五尺挑深六尺起至一丈二尺五寸不等用過土方夫工壩座等項共銀十一萬七千一百五十三兩六錢四分四釐挑挖深遠土方加估夫工銀六千一百六兩九錢

三分四釐東面護城河及超瓢港置買民田遷移草房墳塚用過銀三千二百五十一兩五錢八分八釐德勝河自運河連江橋進口起至江口止河長七千四百四十四丈五尺五寸估挑口寬四丈至十丈底寬一丈六尺至四丈挑深三尺四寸至七尺五寸不等用過土方夫工壩座等項共銀三萬五百七十五兩七錢二分四釐挑挖深遠土方加估夫工共銀四百八十五兩六錢八分二釐澡港河自燕子河工首起至江口止河長五千四百四十八丈四尺估挑口寬三丈五尺至十丈底寬一丈四尺至六丈挑深一

尺至六尺不等用過土方夫工壩座等項銀一萬三千八十五兩一錢八分三釐挑挖深遠土方加估夫工銀一百四十七兩二錢六分二釐以上開挑三河及建設閘座通共估需土方夫工料物等項共銀一十八萬九千六百六十七兩八錢七分六釐又開挑該三河開工以後疊逢雨雪添屏雨水實用水方夫工銀六千九百三十四兩五錢六分四釐以上通共實需銀一十九萬六千六百二兩四錢四分較原估銀二十萬六千七百二十四兩六錢五分二釐計有節省銀一萬一百二十二兩二錢一分二釐惟查三

河之中孟瀆一河有關濟運灌田通商爲利最普而該河道路綿長工艱費鉅挑辦甚難此次開挑集議經數年之久借

帑至十餘萬之鉅兩次開工俱遭雨阻稽遲前後接算歷期有八九月之多以致借領之外賠累不貲官民交困若不亟籌一永久之計非但大工不能數舉凡承辦之人皆重受其累相率視爲畏途後來設有淤墊斷不敢再爲開河之請况該河岸土浮鬆每多坍塌卸加之終日潮汐來往更不免沙積淤停則日積月累湮塞甚易在先之屢次興挑是其明徵必須間隔

三四年卽一爲疏濬擇段開挖庶其開濬必能開通
鉅帑不歸虛擲河流可期永暢但此項工費無出民捐
又力有不能查三河原估銀二十萬六千七百餘兩
已

奏奉

諭旨允準現在改估節省銀一萬一百餘兩據該二縣詳
請仍照原估之數攤徵歸款卽以此項節省之銀歸
於武陽二縣發典生息作爲該河歲修經費於
國計民生裨益實非淺鮮等語先經本司批飭常州府
覈議詳辦茲據該府詳稱該縣等詳請將節省銀兩

發典生息以作歲修實爲善後要務應請俯如縣詳
奏請

諭旨將節省項下餘賸銀兩發典生息以備孟瀆河歲修
經費除飭縣將歲修章程妥議另詳外相應詳候鑒
轉等情本司覆覈無異似應俯如所請將此項工費
按照原估之數攤徵歸款所有節省銀兩發典生息
以備歲修務使河流永暢

帑不虛糜仰副

憲臺惠濟民生永資樂利之意除飭將通工估需銀
數及攤徵年限細數分晰造冊送司覈造司冊另行

詳請 題咨外理合具文詳請伏候

咨鑒覈具

奏并請咨

部查照

道光十三年五月初十日具詳

武進縣知縣姚瑩陽湖縣知縣廖鴻苞爲具詳事案查挑辦孟瀆德勝澡港三河前已將估需土方價買民田添建閘座共銀十八萬九千六百六十七兩八錢七分六釐造冊詳送在案惟此次挑辦三河估辦之時力求節省故三河挑土九十三萬四千四百餘方較諸吳淞江挑土一百一十四萬三千七百餘方計短土方不及十分之二工程不甚相遠而吳淞江夫工壩座銀二十九萬九千一百八十餘兩孟瀆等三河除買民田外夫工壩座銀十六萬七千五百五十四兩零計少銀十三萬一千六百三十餘兩銀數

懸殊已甚水方又不加估民間已多賠累之苦乃三河先一次自十年十二月十三日開工起屢遭陰雨至十一年四月十五日農忙停止後一次自十二年十月初十日起三河次第開工亦因雨雪至本年二月二十日始奉

憲臺驗收工竣前後接算八月有餘而此八月之中非雪卽雨晴霽之日甚少在河滲水旋車旋積稍爲間斷卽勢成汪洋非冒雨加夫晝夜趕車卽晴亦不能下宕是其時屛水最爲要務該董事等非不急公緣土方已多賠累而滲水雨水車屛竟無休息之期

更非意料所及民力實有所難支斷不能因先未詳估水方遂置之不問一任遺誤時急事迫卑職等不得不於車屛夫工加以津貼無如雨雪之期太多遂致津貼之數甚鉅共實用銀六千九百三十兩五錢六分四釐此項俱係正用支銷

藩庫旣無閑款可籌卑職等又實力難賠墊伏查三河土方開座原估銀二十萬六千七百二十四兩六錢五分二釐續經卑職改估復於土方項下節省銀一萬七千五十六兩七錢七分六釐本係河工案內之款今旣河工正用支銷不敷自應仍於節省項下

重刊五續等三河全案 卷五
撥補應請將前項津貼車水夫工銀於前造經費冊內扣除在節省一萬七千餘兩內以六千九百三十四兩五錢六分四釐撥補查照運河估挑水方例價增入估冊造報餘銀一萬一百二十二兩二錢一分二釐發典生息籌備歲修是否有當理合造具水方銀兩清冊詳候

鑒覈

道光十三年三十日具詳

江蘇布政使司陳鑾爲詳請獎勵事竊照挑辦武進縣孟瀆德勝澡港三河及建閘工程印委各員暨董事人等業經本司查明尤爲出力者開具清單詳請憲臺會摺保

奏所有出力稍次人員蒙於摺尾聲明在外分別記功給獎在案本司當卽轉飭該府確加訪查辦工各員及董事等如有盡心竭力始終奮勤者應行酌量酬勞以示鼓勵茲據常州府查造各員及董事姓名清冊詳請前來本司體察勤勞分別等差酌予獎勵俾不泯其微勞相應開摺具詳伏候

鑒覈批示祇遵

計呈送清摺二扣

謹將挑辦孟瀆德勝澡港三河及建閘工程出力稍次各員分別獎勵開具清摺呈候

電鑒

計開

前署常州府督糧通判候補理問鍾其恕

署陽湖縣知縣金咸

以上二員鍾其恕督辦德勝澡港二河自備資斧在工督辦任勞任怨實心實力金咸與武進縣姚令輪

替赴工稽查催辦出力應請各記大功二次

武進縣縣丞方友椿

靖江縣縣丞高恩榮

以上二員方友椿總催孟瀆河南段工程屢遭雨雪往來督催高恩榮分催澡港河工段切實認真應請各子記大功二次

武進縣小河司巡檢陳克昌

武進縣奔牛司巡檢錢勳

陽湖縣馬蹟司巡檢王啟堂

以上三員分催孟瀆河工段均屬勤奮應請各子記

大功一次
候補從九品程德溶

候補從九品徐思榮

候補從九品羅教福

以上三員程德溶總催德勝渠港二河實力查催不

辭勞瘁徐思榮羅教福分催德勝河工段俱係十一

年春工原派之員兩次雨雪多日備極辛勤應請各

予拔委一次

前任武進縣知縣程士偉

前任陽湖縣陞任蘇州府督糧同知廖鴻苞

候補通判姚元浩

候補通判吳尙忠

元和縣主簿周誥

候補主簿李國璜

揚州府檢校蔡立

候補庫大使彭邦畛

前署陽湖縣訓導徐珊

以上各員道光十年冬底挑辦德燥二河及孟瀆超

瓢港小河口各工段於

奏辦工程覈計僅三分之一程士偉廖鴻苞總司其事

姚元浩吳尙忠督催工段周誥委催小河口李國璜
委催德勝口蔡立彭邦畛均委催德勝河徐珊委催
澡港河分段催辦雖因雨阻未及竣工均係曾經出
力之員應請各記大功一次

謹將挑辦孟瀆德勝澡港三河在工出力稍次董事
分別獎勵開具清摺呈候

電鑒

主辦李國璜

計開

主辦周誥

候選知縣嚴城忠

武舉張鑑

以上二董嚴城於孟河改口超瓢港因境隸丹陽係
該董承辦實心出力應請

撫憲

給匾示獎張鑑隨同余保純日夜在工奔走照

料備極辛苦查該董係武舉會試未第揀選三等分
發提標福山營効力續又改發陸路常州營扣至道
光九年正月効力三年期滿例以千總補用應請歸
於

憲

督標聽候差委以千總儘先拔補

分發福建候補縣丞曹臨

該董係回籍措備資斧人員經該鄉耆等畱辦德勝

河附於紳董有案查該董總辦河務備著辛勤應請
咨明閩省記該員大勞二次

通江鄉中下十二圖鄉董生員毛仲揚

通江鄉上六圖鄉董監生馬踰海

通江鄉孟城內橋董兼超瓢港沙洲挑淤各事宜職
員馬省三

孟城護城河董事職員巢爾恭

孟城護城河董事生員費伯雄

孟瀆河孝東鄉鄉董陳黼

孟瀆河孝西鄉十三都四圖圖董蘇敘富

德勝河安東鄉鄉董監生李汝霖

德勝河安東鄉鄉董監生鄒宮桂

以上各董在工實力急公始終如一辛苦賠累從未
稍有退心馬踰海毛仲揚出力尤著應請

撫憲給匾獎示馬省三巢爾恭費伯雄陳黼蘇敘富

憲臺李汝霖鄒宮桂七董擬請由司以協力經營四字各

給匾音獎勵

孟河護城河董事王舍觀

孟河護城河董事邱輔弼

德勝河安東鄉五都三圖董事吉朝奎

德勝河安東鄉六都二圖董事周隆祖

德勝河孝東鄉七都五圖董事徐春芳

德勝河依東鄉三十七都三圖董事錢正寅

德勝河依西鄉四十都三圖董事曹敏

澡港河原呈高舜耕監生張克俊孫洪謨

以上各董在工辦事俱極認真擬請飭府給匾獎勵
此外出力稍次者自應由縣給匾示勵

通江鄉職監巢冠峯巢玉峯前因不諳董務共捐洋
錢二千元貼補經費係爲免董起見毋庸請獎現又
共捐錢一千四百千文辦造木橋四座實爲好善急

公並請

撫憲給匾以示激勸

道光十三年八月二十三日發申

江蘇布政使司陳爲專札飭提事案照道光十年開
挑孟瀆德勝溧港三河

奏借司庫糶變緩漕米價銀二十萬六千七百二十四
兩六錢五分二釐歸於均沾水利之武進陽湖二縣
合攤五成無錫金匱宜興荆溪四縣分攤五成統限
十年隨同條銀徵解還款奉

旨從道光十五年起徵轉行欽遵在案所有本年上忙應
徵銀兩迄今未據批解實屬違延合亟開單專札飭
提札到該府立飭遵照迅將單開應徵前項河工銀
兩勒限文到卽日全數徵完填批僉役星馳解司兌

收造報母任再延致干未便

計開單

道光十年開挑孟瀆德勝澡港三河

奏借糶變緩漕米價銀二十萬六千七百二十四兩六錢五分二釐歸於均沾水利之武進陽湖二縣合攤五成無錫金匱宜興荆溪四縣分攤五成統限十年隨同條銀攤徵起解歸款本自道光十四年卽應起徵因值歉收民情竭蹶展緩

奏奉

諭旨從道光十五年上忙起至道光二十四年下忙止按

忙徵解計

武進縣應攤二成五分共銀五萬一千六百八十一兩一錢六分三釐每年應徵銀五千一百六十八兩一錢一分七釐

陽湖縣應攤二成五分共銀五萬一千六百八十一兩一錢六分三釐每年應徵銀五千一百六十八兩一錢一分七釐

無錫縣應攤一成二分五釐共銀二萬五千八百四十四兩五錢八分一釐五毫每年應徵銀二千五百八十四兩五分九釐

金匱縣應攤一成二分五釐共銀二萬五千八百四十兩五錢八分一釐五毫每年應徵銀二千五百八十四兩五分九釐

宜興縣應攤一成二分五釐共銀二萬五千八百四十兩五錢八分一釐五毫每年應徵銀二千五百八十四兩五分九釐

荆溪縣應攤一成二分五釐共銀二萬五千八百四十兩五錢八分一釐五毫每年應徵銀二千五百八十四兩五分九釐

道光十五年四月十九日札常州府

